

# PM kerap terapkan mesej kepada generasi muda

UM 20 JUN 2003

KUALA LUMPUR 19 Jun — Anggota Kelab UMNO Luar Negara menyifatkan Presiden UMNO, Datuk Seri Dr. Mahathir Mohamad sebagai negarawan yang sentiasa menerapkan mesej supaya generasi muda mewarisi bakat kepimpinannya agar negara kekal bersaing maju di peringkat antarabangsa.

Menurut mereka, mesej Dr. Mahathir itu kerap disampaikan menerusi ucapannya sebelum ini yang menyentuh pelbagai isu tempatan dan antarabangsa bertujuan menyedarkan rakyat negara ini agar menjadi bangsa yang berjiwa besar dan tekun menimba ilmu.

Anggota Kelab UMNO Korea Selatan, Shamsul Rijal Yahaya, 36, berkata kegigihan Dr. Mahathir yang berjaya meletakkan kemajuan negara ke peringkat dunia itu perlu dihayati supaya semangat perjuangannya dapat diwarisi oleh generasi muda.

Menurut beliau, ucapan dasar Dr. Mahathir pada perhimpunan agung parti yang bertemakan 'Ancaman Masa Depan' itu turut menyampaikan mesej su-

si masyarakat 'bersiap sedia' menghadapi masa depan terutama ancaman penjajahan asing.

"Dr. Mahathir telah berjaya membawa pemikiran kita lebih jauh ke hadapan supaya dapat membuat persiapan lebih awal dalam menghadapi sebarang kemungkinan," katanya.

Beliau menyatakan demikian ketika mengulas ucapan dasar Dr. Mahathir pada Perhimpunan Agung UMNO Ke-54 di Pusat Dagangan Dunia Putra (PWTC) hari ini.

Anggota Kelab UMNO Surabaya, Mohamed Zayad Yatim, 25, pula menganggap ucapan Dr. Mahathir yang sentiasa bersemangat dan bernas jelas mempunyai mesej supaya setiap generasi muda perlu mewarisi semangat perjuangannya.

"Antaranya ciri perjuangan Dr. Mahathir yang boleh diwarisi ialah keberaniannya menyatakan pendapat yang berkait dengan isu antarabangsa sehingga mampu mengubah keadaan dunia," katanya.

Anggota Kelab UMNO Yogyakarta, Affuan Mohd. Hussain, 25, ber-

kata, terdapat tiga aspek yang diberi penekanan di dalam ucapan dasar Dr. Mahathir meliputi isu antarabangsa, kepimpinan dan politik UMNO.

"Ucapan Dr. Mahathir yang mengandungi mesej penting itu perlu dinilai sebagai pedoman terutama oleh pemimpin muda UMNO sebagai amanat menjelang persaraannya pada Oktober ini," katanya.

Pengerusi Kelab UMNO Leicester, United Kingdom, Zahrulnizam Abdul Majid, 25, percaya para perwakilan tidak akan mempersiapkan ucapan dasar terakhir Dr. Mahathir yang merangkumi semua aspek kepentingan masa kini dan akan datang.

"Dr. Mahathir telah menyentuh isu global mengenai ancaman senjata pemusnah oleh kuasa besar dunia pada masa depan yang memerlukan kita supaya perlu bersiap sedia dan memerlukan lebih ramai cerdik pandai serta tenaga profesional," katanya.